

PENGGUNAAN DINAR EMAS SEBAGAI MEDIUM BERWAKAF: ANALISIS PANDANGAN SARJANA ISLAM

THE USE OF THE GOLD DINAR AS A WAQF MEDIUM: AN ANALYSIS OF THE VIEWS OF ISLAMIC SCHOLARS

Che Khadijah Hamid¹
Surita Hartini Mat Hassan¹
Sakinatul Raadiyah Abdullah¹
Salimah Yahaya¹
Farahdina Fazial¹

¹Akademi Pengajian Islam Kontemporari (ACIS), Universiti Teknologi Mara (UiTM), Malaysia, (E-mail: chekhadijah@uitm.edu.my; suritahartini@uitm.edu.my; sakinatulraadiyah@uitm.edu.my; salimahyahya@uitm.edu.my; farahdinafazial@uitm.edu.my)

Article history

Received date : 12-12-2021
Revised date : 13-12-2021
Accepted date : 15-2-2022
Published date : 15-3-2022

To cite this document:

Hamid, C. K., Mat Hassan, S. H., Abdullah, S. R., Yahaya, S., & Fazial, F. (2022). Penggunaan Dinar Emas Sebagai Medium Berwakaf: Analisis Pandangan Sarjana Islam. *Journal of Islamic, Social, Economics and Development (JISED)*, 7(43), 141 - 154.

Abstrak: Wakaf merupakan satu bentuk kehartaan yang menjadi salah satu penyumbang dalam pembangunan Islam. Amalan berwakaf menggunakan wang fiat merupakan instrumen yang diguna pakai dalam kebanyakan kaedah wakaf tunai pada hari ini. Hasil penelitian kepada sorotan karya yang dilakukan mendapati wang fiat mempunyai kelemahan antaranya terdapat unsur riba, inflasi, susut nilai, unsur ketidakpastian, tiada nilai intrinsik dan ketidakadilan. Oleh kerana kelemahan tersebut, kajian ini melihat bahawa permasalahan yang ada pada sifat wang fiat boleh mengganggu gugat elemen kekekalan Ain dalam amalan wakaf tunai. Ekoran itu, kajian ini mencadangkan agar dinar emas dijadikan alternatif kepada wang fiat dalam melakukan ibadah wakaf khususnya dalam mewujudkan kaedah berwakaf secara wakaf tunai. Justeru itu, kajian ini akan memfokuskan analisis ke atas dinar emas sebagai medium berwakaf tertumpu kepada mengenal pasti asas dinar emas sebagai medium berwakaf berdasarkan al-Quran menurut pandangan sarjana Islam. Kajian ini berbentuk penerokaan, maka pengumpulan data diperoleh daripada kajian dokumen. Data dianalisis menggunakan kaedah analisis kandungan. Hasil kajian mendapati, di dalam al-Quran tidak terdapat sebarang nas yang menyentuh tentang penggunaan dinar emas sebagai salah satu medium berwakaf. Namun begitu, wakaf melalui penggunaan dinar emas ini dapat dikaitkan dengan elemen berwakaf selari dengan konsep bersedekah.

Kata Kunci: Wakaf Tunai, Dinar Emas, al-Quran

Abstract: Waqf is a form of property that is one of the contributors in the development of Islam. The practice of waqf using fiat money is an instrument used in most cash waqf methods today. The results of the research on the highlights of the work found that fiat money has weaknesses such as there are elements of usury, inflation, depreciation, elements of uncertainty, no intrinsic value and injustice. Because of these shortcomings, this study sees that the existing problems

on the nature of fiat money can disrupt the *Ain* perpetual element in the practice of cash waqf. As a result, this study suggests that the gold dinar be used as an alternative to fiat money in performing waqf worship, especially in creating waqf methods by cash waqf. Therefore, this paper will focus on the analysis of the gold dinar as a waqf medium focused on identifying the basis of the gold dinar as a waqf medium based on the Quran according to the views of Islamic scholars. This study is in the form of exploration, then data collection is obtained from document review. Data were analyzed using content analysis method. The results of the study found that in the Qur'an there is no text that touches on the use of gold dinars as one of the waqf mediums. However, waqf through the use of gold dinars can be associated with the element of waqf in line with the concept of charity.

Keywords: Cash Endowment, Gold Dinar, Quran

Pengenalan

Secara umumnya, kajian ini akan memfokuskan analisis ke atas dinar emas sebagai medium berwakaf yang menumpukan kepada mengenal pasti asas dinar emas sebagai medium berwakaf berdasarkan al-Quran menurut pandangan sarjana Islam. Perkara ini diteliti ekoran penggunaan wang *fiat* dalam sistem wakaf tunai dilihat mempunyai beberapa kelemahan. Isu pertama adalah berkenaan penggunaan wang itu sendiri. Persoalan mengenai wang *fiat* ternyata agak rumit, antaranya persoalan mengenai apakah duit kertas yang ada di sekeliling kita pada hari ini dan bagaimanakah duit tersebut dicipta? Siapa yang mencetaknya dan atas dasar apakah? (Zaharuddin Abd. Rahman, 2010). Keadaan ini bertambah buruk apabila penelitian ke atas wang *fiat* juga turut mendapati berlakunya susut nilai yang berpunca daripada percetakan dan pengeluaran tanpa had (Salmy Edawati Yaacob, Sanep Ahmad & Wan Najihah Wan Mohd Zabaria, 2009). Oleh kerana kelemahan tersebut, kajian ini melihat bahawa permasalahan yang ada pada sifat wang *fiat* boleh mengganggu gugat elemen kekekalan *Ain* dalam amalan wakaf tunai. Ekoran itu, kajian ini mencadangkan agar dinar emas dijadikan alternatif kepada wang *fiat* dalam melakukan ibadah wakaf khususnya dalam mewujudkan kaedah berwakaf secara wakaf tunai.

Sehubungan dengan itu, penelitian mendapati penghujahan tentang wakaf, fokus diberikan kepada dalil-dalil yang sering kali menjadi perbincangan dalam konteks wakaf. Surah-surah yang diketengahkan antaranya surah '*Ali-Imran* 3:92, '*Ali-Imran* 3:180, *al-Baqarat* 2:280, *al-Baqarat* 2:245, *al-Baqarat* 2:261, *al-Baqarat* 2:219 dan *al-Hajj*: 22:77. Bagi surah *Al-An'am* 6:32, dalil yang dikemukakan adalah bertujuan menyokong penghuraian yang diteliti. Oleh yang demikian, dalil tersebut tidak mengambil kira konteks wakaf. Penghujahan tentang dinar dan dirham serta *wariq*, fokus diberikan kepada dalil-dalil yang mempunyai perkataan dinar, dirham dan *wariq* dalam al-Qur'an. Surah-surah yang diketengahkan antaranya surah '*Ali-Imran* 3:14, '*Ali-Imran* 3:91, *al-tawbat* 9:34, *Al-Kahf* 18:31, *al-Hajj* 22:23, *al-Fatir* 35:33, *al-Zukhruf* 43:53 dan *al-Zukhruf* 43:71. Pemaparan tentang dirham dan *wariq* menengahkan dua surah yang diteliti antaranya surah Yusuf 12:20 dan *Al-Kahf* 18:19. Oleh yang demikian, dalam penghujahan tentang dalil-dalil mengenai wakaf, dinar dan dirham serta *wariq* dibincangkan satu persatu. Dalil-dalil mengenai wakaf dibincangkan terlebih dahulu, kemudian diikuti perbincangan dalil-dalil mengenai dinar dan dirham serta *wariq*.

Metodologi Kajian

Kajian ini bersifat kajian kualitatif yang mana ditumpukan kepada kajian berbentuk penerokaan. Pengumpulan data dalam kajian ini adalah diperolehi hasil daripada kajian dokumen. Data-data yang diperolehi dianalisis menggunakan kaedah analisis kandungan.

Hasil Kajian Dan Perbahasan

i. Dalil-dalil Dalam al-Qur'an Mengenai Wakaf

Secara umumnya, dalam al-Qur'an tidak dinyatakan secara jelas tentang konsep wakaf secara khusus. Walau bagaimanapun, terdapat beberapa dalil al-Qur'an yang menyeru manusia melakukan kebaikan untuk mencapai reda Allah SWT. Kebaikan yang dimaksudkan adalah menyentuh berkenaan konsep bersedekah. Oleh sebab itu, dalam al-Qur'an perkataan yang membawa maksud "*mereka yang percaya dan membuat amal kebajikan*" misalnya telah disebut sebanyak 37 kali (Razali Othman, 2013:05). Maka, dasar yang digunakan untuk menerangkan konsep wakaf ini didasarkan pada keumuman ayat-ayat al-Qur'an yang menjelaskan tentang amalan bersedekah atau infaq. Berdasarkan dalil pertama mengenai wakaf, Allah SWT telah berfirman dalam surah 'Ali- 'Imran 3:92 yang bermaksud:

"Kamu tidak sekali-kali akan dapat mencapai (hakikat) kebajikan dan kebaktian (yang sempurna) sebelum kamu dermakan sebahagian daripada apa yang kamu sayangi. Dan sesuatu apa jua yang kamu dermakan maka sesungguhnya Allah mengetahui" ('Ali-'Imran, 3:92).

Berdasarkan kepada dalil daripada surah 'Ali-'Imran 3:92 di atas, Sayyid Qutb (2000a), mentafsirkan bahawa orang-orang Islam pada waktu turunnya ayat ini, mereka telah memahami maksud arahan Allah SWT dan mereka begitu berkeinginan untuk mencapai darjah kebaktian yang menjadi intipati segala kebaikan dan kebajikan dengan menyerahkan segala apa yang disayangi, mengorbankan harta benda kerana mengharapkan balasan yang lebih besar dan menjadi keutamaan. Sehubungan dengan pengertian yang dikemukakan, dapat difahami bahawa Allah SWT menyeru agar hamba-Nya membelanjakan harta ke jalan yang diredai. Perkara ini bermaksud, harta yang dimiliki oleh seseorang perlulah dibahagikan, didermakan dan melakukan amalan bersedekah seperti juga amalan berwakaf. Sekiranya, perbuatan yang dinyatakan tersebut dilaksanakan maka balasan pahala yang sangat besar dijanjikan oleh Allah SWT kepada mereka yang tergolong dalam kalangan tersebut.

Sementara itu, dalil kedua berhubung kebaikan bersedekah dinyatakan dalam firman Allah SWT dalam surah *al-Baqarat* 2:280 yang bermaksud:

"Dan jika orang yang berhutang itu sedang mengalami kesempitan hidup, maka berilah tempoh sehingga ia lapang hidupnya dan (sebaliknya) bahawa kamu sedekahlah hutang itu (kepadanya) adalah lebih baik untuk kamu, kalau kamu mengetahui (pahalanya yang besar yang kamu akan dapati kelak)" (al-Baqarat, 2:280)

Menurut Ahmad Mustafa Al-Maraghiy (2001b), maksud ayat ini ialah jika seseorang yang berhutang sedang menanggung kesulitan untuk melunaskan hutang, maka hendaklah pemiutang menunggu atau memberi tempoh sehingga pemiutang tersebut melunaskan hutangnya. Dalam pada itu, maksud ayat ini juga diertikan sebagai seseorang yang bersedekah kepada orang berhutang yang sedang menanggung kesulitan dengan

membebaskan sebahagian atau seluruh hutangnya. Justeru itu beliau menyifatkan amalan bersedekah adalah lebih baik dan lebih besar pahalanya di sisi Allah SWT dan sangat menganjurkan supaya memberi sedekah dan berlapang dada terhadap kesulitan seseorang. Beliau menegaskan bahawa sikap berlapang dada dapat mencerminkan kasih sayang, kemurahan hati dan kebaikan seseorang kepada yang lain. Sehubungan dengan itu, penelitian dalam dalil kedua ini mempamerkan bahawa setiap kebajikan dan kebaikan yang dilakukan akan dipandang mulia oleh Allah SWT. Kemuliaan ini dapat dicapai apabila hamba-Nya seikhlas hati membelanjakan harta dengan tujuan mendapat reda-Nya, maka Allah SWT telah menjanjikan kenikmatan lebih daripada apa yang hamba-Nya miliki sebelum ini.

Di samping itu, dalam surah *al-Baqarat* 2:245 dan surah *al-Baqarat* 2:261 turut sama mendorong umat Islam agar berbuat baik dengan bersedekah seperti mana dalil kedua yang dikemukakan sebelum ini. Oleh sebab itu, surah *al-Baqarat* 2:245 dan surah *al-Baqarat* 2:261 menjadi dalil ketiga dan keempat diteliti mengenai konsep berwakaf melalui amalan bersedekah. Intipati surah *al-Baqarat* 2:245 adalah bermaksud seperti berikut:

“Siapakah yang mahu memberikan pinjaman kepada Allah SWT sebagai pinjaman yang baik supaya Allah SWT melipatgandakan balasannya dengan berganda-ganda banyaknya. Dan Allah SWT menyempitkan dan meluaskan (pemberian rezeki) dan kepada-Nya kamu semua dikembalikan”

(*al-Baqarat*, 2:245).

Mengambil kira terjemahan yang dilakukan oleh Ahmad Mustafa Al-Maraghiy (2001a), beliau menyifatkan Allah SWT menganjurkan untuk bersedekah pada jalan-Nya. Beliau menyifatkan bahawa amalan sedekah sebagai amalan yang memberi semangat kepada jiwa dan meringankan tangan untuk menderma, manakala infaq dilihat sebagai satu pinjaman kepada Allah SWT. Padahal, Allah SWT tidak memerlukan sesuatu kerana Allah SWT mengetahui manusia kurang berminat atau berkeinginan mengorbankan harta untuk kepentingan umum. Oleh sebab itu, amalan bersedekah perlu dilakukan dengan hati yang terbuka tanpa paksaan. Bagi surah *al-Baqarat* 2:261 yang dinyatakan sebagai dalil keempat diteliti dalam kajian ini, turut mencakupi saranan-saranan berbuat baik melalui amalan bersedekah. Perkara seumpama ini dapat diteliti berdasarkan pengertian yang membawa maksud begini:

“Bandingan (derma) orang-orang yang membelanjakan hartanya pada jalan Allah, ialah sama seperti sebiji benih yang tumbuh menerbitkan tujuh tangkai; tiap-tiap tangkai itu pula mengandung seratus biji. Dan (ingatlah), Allah akan melipatgandakan pahala bagi sesiapa yang dikehendakiNya, dan Allah Maha Luas (Rahmat) kurniaNya, lagi meliputi ilmu pengetahuanNya.

(*al-Baqarat*, 2:261)

Melalui Ahmad Mustafa Al-Maraghiy (2001b), pentafsiran surah *al-Baqarat* 2:261 tersebut menyentuh tentang seseorang yang mencari keredaan Allah SWT dengan mendermakan hartanya, dinyatakan lagi bahawa Allah SWT berfirman bahawa kebaikan bagi seseorang yang bersedekah akan memperoleh pahala seperti orang yang menanam sebiji benih di atas tanah yang subur. Kemudian, terhasil tujuh tangkai iaitu daripada sebatang pohon bercabang tujuh tangkai biji benih. Perkara ini bermakna, pada setiap tangkai mengeluarkan seratus biji benih. Sehubungan dengan pentafsiran yang dinyatakan terhadap surah *al-Baqarat* 2:245 dan *al-Baqarat* 2:261, memperlihatkan tentang Allah SWT menyebut mengenai melipatgandakan pahala kepada sesiapa sahaja hamba-Nya yang dikehendaki. Dengan ini, dapat dinyatakan

bahawa amalan melakukan kebajikan dan kebaikan adalah antara amalan yang sangat dituntut dalam Islam. Perkara ini turut sama dinyatakan dalam dalil kelima melalui surah *al-Hajj* 22:77 Allah SWT berfirman yang bermaksud:

“Wahai orang-orang yang beriman! Ruku’lah serta sujudlah (mengerjakan sembahyang) dan beribadatlah kepada Tuhan kamu (dengan mengtauhidkanNya) serta kerjakanlah amalan-amalan kebajikan supaya kamu berjaya (di dunia dan di akhirat)”
(*al-Hajj*, 22:77).

Ibnu Katsier (1994), beliau mengemukakan maksud ayat dalam surah *al-Hajj* 22:77 adalah mengenai firman Allah SWT yang menyeru kepada orang-orang yang beriman agar tekun berukuk, bersujud dan menyembah Allah SWT serta berbuat amal-amal yang baik supaya memperoleh kemenangan dunia dan akhirat.

Justeru itu, apabila manusia melakukan dengan kerelaan hatinya, maka Allah SWT akan memberi pahala kepada sesiapa sahaja yang dikehendaki-Nya. Oleh sebab itu, sebagai umat Islam khususnya amalan bersedekah ini adalah antara amalan baik yang perlu direbut untuk dikerjakan. Namun, amatlah rugi jika sekiranya amalan ini tidak dituruti. Perkara ini dapat diteliti daripada dalil keenam yang dikaitkan dengan kajian ini, dalam *al-Qur’an* Allah SWT berfirman dalam surah *‘Ali-‘Imran* 3:180 yang bermaksud:

“Dan jangan sekali-kali orang yang bakhil dengan harta benda yang telah dikurniakan Allah kepada mereka daripada kemurahan-Nya menyangka bahawa kebakhilan itu baik bagi mereka. Bahkan ia adalah buruk bagi mereka. Mereka akan dikalungkan dengan apa yang mereka bakhilkan itu pada hari kiamat kelak. Dan bagi Allah jualah hak milik segala warisan langit dan bumi. Dan Allah Maha Mengetahui akan segala apa yang kamu kerjakan”

(*‘Ali-‘Imran*, 3:180)

Menurut Sayyid Qutb (2000b) menerangkan mereka bukannya bakhil dengan harta kekayaan, sementara itu mereka datang ke dunia ini juga tanpa memiliki sesuatu, kemudian Allah SWT yang memberi kepada mereka harta daripada limpah kurnia-Nya sehingga mereka menjadi kaya raya. Justeru itu, menurut Sayyid Qutb (2000b), mereka diminta menginfakkan sebahagian daripada limpah Allah SWT yang diberikan. Walaupun begitu, bagi mereka yang bakhil mengeluarkan sedikit harta dan mengira bahawa menyimpan harta itu adalah lebih baik sedangkan yang sebenarnya perbuatan itu mendatangkan akibat yang amat buruk. Diperjelaskan lagi oleh Sayyid Qutb (2000b), harta kekayaan yang disimpan itu hanya untuk satu jangka waktu yang pendek sahaja. Kemudian, semuanya akan pulang kepada Allah SWT dan tiada yang tinggal melainkan kadar harta yang diinfakkan. Perkara itulah, satu-satunya harta kekayaan yang disimpan di sisi Allah SWT. Selain itu, dinyatakan lagi bahawa Allah SWT mengecam orang-orang yang memiliki harta kekayaan, kemudian seseorang yang menganggap dirinya terkaya daripada Allah SWT dan tidak lagi memerlukan kepada ganjaran serta balasan-Nya yang berlipat ganda yang dijanjikan Allah SWT kepada orang-orang yang menginfakkan harta.

Oleh yang demikian, jelaslah bahawa Allah SWT tidak suka kepada orang yang bersifat bakhil atau lebih mudah lagi adalah bersifat kedekut. Allah SWT menjelaskan lagi bahawa sekiranya hamba-Nya bersifat sedemikian mereka akan disoal di akhirat kelak. Justeru, perlu diketahui oleh umat Islam bahawa apa jua bentuk harta kekayaan dan kemewahan adalah sementara

sahaja kerana semuanya akan dikembalikan menjadi milik Allah SWT. Oleh yang demikian, akhirat adalah tempat terakhir dalam perjalanan seseorang manusia.

Sementara itu, bagi dalil ketujuh iaitu surah *Al-'An'am* 6:32 dikemukakan untuk memperjelaskan tentang kepentingan berfikir tentang akhirat sebagaimana yang telah dinyatakan sebelum ini bahawa perjalanan terakhir seseorang manusia adalah di alam akhirat. Memandangkan amalan bersedekah seperti berwakaf adalah salah satu amalan yang dapat membantu umat Islam mencapai kemenangan di akhirat kelak. Berdasarkan itu, dalam surah *Al-'An'am* 6:32 yang menjelaskan bermaksud:

“Dan tidak (dinamakan) kehidupan dunia melainkan permainan yang sia-sia dan hiburan yang melalaikan: dan demi sesungguhnya negeri akhirat itu lebih baik bagi orang-orang yang bertaqwa. Oleh itu, tidakkah kamu mahu berfikir?

(*Al-'An'am*, 6:32).

HAMKA (1983), menjelaskan pengertian surah *Al-'An'am* 6:32, adalah diertikan sebagai dunia ini hanya permainan semata-mata dan memperingatkan bahawa sebaik-baiknya hanya di akhirat kelak. Seseorang yang berfikir panjang, seseorang itu tidak melihat kepada apa yang kelihatan pada mata sahaja tetapi juga memikirkan perkara yang tidak dapat dilihat. Oleh yang demikian, seseorang wajib melalui alam dunia terlebih dahulu dan melakukan kebaikan untuk mencapai kejayaan di akhirat.

Maka dengan sebab itulah, amalan berbuat kebajikan dan kebaikan seperti amalan wakaf sangat dituntut dalam Islam. Namun, apa yang lebih baiknya daripada amalan wakaf adalah sifatnya yang kekal. Walau bagaimanapun, tidak terdapat sebarang nas yang menunjukkan seberapa banyak jumlah dan ukuran yang perlu dilakukan oleh manusia untuk melakukan amal kebajikan dan kebaikan seperti yang telah dinyatakan. Bagi dalil kelapan, dalam surah *al-Baqarat* 2:219 Allah SWT telah berfirman yang bermaksud:

“Mereka bertanya kepadamu (wahai Muhammad) mengenai arak dan judi. Katakanlah: Pada keduanya dosa besar dan ada pula manfaat bagi manusia, tetapi dosa keduanya lebih besar daripada manfaatnya. Dan mereka bertanya kepadamu: Apakah yang mereka akan belanjakan (dermakan)? Katakanlah: (Dermakanlah apa-apa) yang berlebih daripada keperluan (kamu). Demikianlah Allah menerangkan kepada kamu ayat-ayat-Nya (keterangan-keterangan hukum-Nya) supaya kamu berfikir”
 (al-Baqarat, 2:219).

Berdasarkan Ahmad Mustafa Al-Maraghiy (2001a), al-Qur'an menggunakan perkataan “yang berlebih dari keperluan” supaya setiap orang dapat menentukan sendiri berdasarkan masa dan keadaan mereka. Maksudnya infaq yang diluar kewajipan berzakat iaitu sedekah kepada individu atau untuk kepentingan umum. Dalam pada itu, dalam penulisan yang dilakukan oleh Razali Othman (2013) beliau menerangkan bahawa ungkapan “lebih daripada keperluan” yang digunakan dalam ayat di atas membawa maksud “lebih keperluan diri”, “lebih penggunaan”, “lebih yang tidak diperlukan” atau “lebih selepas memenuhi keperluan diri”. Perkara ini bermaksud bahawa berapa bilangan yang diperlukan untuk bersedekah adalah perkara subjektif, ukurannya adalah berdasarkan kepada keperluan seseorang tanpa membebankan mereka. Ungkapan “lebih daripada keperluan” difahami bahawa sesuatu harta yang dimiliki seseorang yang dirasai bahawa harta tersebut juga perlu dikongsi bersama.

Walau bagaimanapun, jika ditinjau dari aspek wakaf pula kadar dan jumlah harta tidak dinyatakan dengan jelas, Namun, seperti yang dibincangkan sebelum ini melalui surah *Ali 'Imran* 3:92, Allah SWT mengungkapkan tentang “*sebahagian daripada apa yang kamu sayangi*”. Oleh itu, jelaslah bahawa umat Islam dianjurkan membahagikan harta kekayaan antara satu sama lain terutama harta yang disayangi, maka hanya orang benar-benar ikhlas sahaja dapat berbuat demikian.

ii. Dalil-dalil Dalam al-Qur'an Mengenai Dinar Emas

Perbincangan dalil-dalil mengenai dinar emas mencakupi sembilan ayat di dalam al-Quran. Kesemua ayat yang diteliti mempunyai perkara-perkara berkenaan dinar emas dan juga emas. Secara umumnya, terdapat sekurang-kurangnya satu perkataan dinar disebut dalam al-Qur'an dan perkataan emas pula disebut sebanyak lapan kali[1]. Surah yang menyebut perkataan dinar ialah surah '*Ali- 'Imran* 3:75, manakala surah yang menyebut perkataan emas ialah surah '*Ali- 'Imran* 3:14, surah '*Ali- 'Imran* 3:91, surah *al-tawbat* 9:34, surah *Al-Kahf* 18:31, surah *al-Hajj* 22:23, surah *al-Fatir* 35:33, surah *al-Zukhruf* 43:53 dan surah *al-Zukhruf* 43:71. Satu dalil yang menggunakan perkataan dinar dalam al-Qur'an adalah dalam surah '*Ali- 'Imran* 3:75 yang bermaksud:

“Dan di antara Ahli Kitab, ada orang yang kalau engkau amanahkan dia menyimpan sejumlah besar harta sekalipun, ia akan mengembalikannya (dengan sempurna) kepadamu, dan ada pula di antara mereka yang kalau engkau amanahkan menyimpan satu dinar pun, ia tidak akan mengembalikannya kepadamu kecuali kalau engkau selalu menuntutnya. Yang demikian itu ialah kerana mereka mengatakan: “Tidak ada jalannya kami menanggung dosa mengenai orang-orang yang Ummi dan, mereka pula selalu berkata dusta terhadap Allah sedang mereka mengetahui (bahawa mereka adalah berdusta)

(*'Ali- 'Imran*, 3:75).

Sehubungan dengan itu, Ibnu Katsir (2008a:93) berpandangan Allah SWT berfirman bahawa orang jika diberikan kepadanya harta yang banyak dan dikembalikan adalah bermaksud jika harta kekayaan lebih sedikit dari itu, maka tentu saja akan lebih menunaikannya. Kemudian, ada juga orang jika kamu memberikan kepadanya satu dinar, tidak dikembalikan kepadamu, kecuali jika kamu selalu meminta yang bermaksud orang-orang yang meminta dan terus menerus menagih untuk mendapatkan haknya. Jika terdapat satu dinar sahaja, tentu sahaja dia tidak mengembalikannya kepadamu. Sementara itu, menurut tafsiran yang dibuat oleh *al-Tha'labiyy* (t.t) dalam kitab tafsirnya *al-Jawahir al-Hisan fi Tafsir al-Qur'an* pula, beliau berpandangan bahawa ayat ini tidak datang dalam bentuk ditujukan untuk menceritakan dinar sebagai unit perkiraan mata wang, tetapi secara tidak langsung dapat difahami bahawa jumlah satu dinar adalah unit kiraan terkecil dalam pengiraan mata wang emas. Dengan sebab itu, perbincangan ini mengambil kira pengertian yang dibuat oleh *al-Tha'labiyy* bahawa secara tidak langsung dinar yang dikemukakan dalam surah *Ali- 'Imran*, 3:75 mencakupi juga sebagai salah satu unit pengiraan mata wang yang diperbuat daripada emas sebagaimana dinar. Dalam pentafsiran yang diujulkan, jelas menunjukkan dinar memainkan peranan yang cukup penting sebagai instrumen pertukaran bagi memudahkan urusan-urusan yang berkaitan ekonomi antaranya mengumpulkan harta kekayaan, elemen pembayaran, instrumen komoditi yang memberi pulangan baik. Maka, dinar dilihat sebagai barang komoditi yang sangat diperlukan oleh manusia bagi memudahkan urusan kewangan.

Seterusnya, penerangan tentang dalil-dalil mengenai emas diperincikan satu persatu. Surah pertama adalah surah 'Ali- 'Imran 3:14, mengemukakan tentang emas, dinyatakan bahawa Allah SWT berfirman yang bermaksud:

“Dijadikan indah pada (pandangan) manusia kecintaan kepada apa-apa yang diingini, iaitu: wanita-wanita, anak-anak, harta yang banyak dari jenis emas, perak, kuda pilihan, binatang-binatang ternak dan sawah ladang. Itulah kesenangan hidup di dunia: dan di sisi Allah-lah kembali yang baik (syurga)”
 ('Ali-'Imran, 3:14).

Berdasarkan pentafsiran yang dibuat oleh Ibnu Katsir (2008a:23), Allah SWT berfirman mengenai apa yang dijadikan indah bagi manusia dalam kehidupan dunia. Perkara ini bermaksud manusia boleh memperoleh berbagai kenikmatan di dunia seperti kenikmatan wanita dan anak-anak. Menurut Ibnu Katsir (2008a) lagi dalam surah 'Ali- 'Imran 3:14, Allah SWT memulainya dengan menyebut berkenaan wanita kerana fitnah yang ditimbulkan oleh wanita itu lebih berat. Secara jelasnya, perkara yang dapat difahami daripada pengertian yang dikemukakan oleh Ibnu Katsir (2008a) menghujahkan tentang wanita dan dikaitkan dengan perhiasan yang dapat memberi kenikmatan. Berdasarkan penelitian, didapati perkataan emas secara tidak langsung dapat difahami menunjukkan tentang kecantikan dan kesenangan hidup di dunia. Kecenderungan manusia kepada perhiasan adalah satu fitrah manusia untuk memenuhi syahwat. Oleh yang demikian, emas dalam surah tersebut lebih menjurus kepada syahwat seseorang manusia. Keduanya, dalam surah 'Ali- 'Imran , 3:91 Allah SWT telah berfirman yang maksudnya:

“ Sesungguhnya orang-orang yang kafir, lalu mati sedangkan mereka tetap kafir, maka tidak sekali-kali akan diterima daripada seseorang di antara mereka: emas sepenuh bumi, walaupun ia menebus dirinya dengan (emas yang sebanyak) itu. Mereka itu akan mendapat azab seksa yang tidak terperi sakitnya, dan itu, mereka itu akan mendapat azab seksa yang tidak terperi sakitnya, dan mereka pula tidak akan beroleh seorang penolong pun”
 ('Ali-'Imran, 3:91).

Dikemukakan oleh Ibnu Katsir (2008a:113), dalam ayat ini Allah SWT menghubungkan kalimat “*walaupun dia menebus dirinya dengan sebanyak mana emas*” menunjukkan bahawa tebusan emasnya lain dari emas yang dinafkahkan. Selain itu, dinyatakan juga ayat ini bererti tidak ada sesuatu pun yang dapat menyelamatkan orang kepada dari siksa Allah SWT meskipun menebus dirinya dengan emas walaupun sepenuh isi bumi, seberat gunung, tanah dan pasir. Berdasarkan dalil tersebut, penggunaan perkataan emas berupa emas yang digunakan untuk menebus diri orang kafir, dikaitkan dengan pembalasan yang pedih bakal diterima mereka. Justeru, orang-orang yang meninggal dalam kekafiran tidak akan diterima daripada seorang pun di antara mereka walaupun sepenuh bumi. Ungkapan “*sepuh bumi*” boleh ditakrifkan sebagai suatu jumlah harta yang banyaknya seisi bumi. Dengan sebab itu, walaupun emas ditukar ganti sebagai tidak dihukum di akhirat kelak, pembalasannya tetap akan diterima oleh mereka. Dalil ketiga pula, perkataan emas turut dirujuk kepada sikap kedekut seseorang untuk melakukan amalan baik dan disukai Allah SWT seperti bersedekah. Perkara ini dinyatakan dalam firman Allah SWT dalam surah *al-tawbat* 9:34 yang bermaksud:

“Wahai orang-orang yang beriman! Sesungguhnya banyak di antara pendita-pendita dan ahli-ahli agama (Yahudi dan Nasrani) memakan harta orang ramai dengan cara yang salah, dan mereka menghalangi (manusia) dari jalan Allah (agama Islam). Dan (ingatlah) orang-orang yang menyimpan emas dan perak serta tidak membelanjakannya pada jalan Allah, maka khabarkanlah kepada mereka dengan (balasan) azab seksa yang tidak terperi sakitnya”

(al-tawbat, 9:34).

Menurut penerangan oleh Ibnu Katsir (2008b), Allah SWT berfirman bahawa orang-orang yang menimbun emas dan perak dan tidak menafkahkan di jalan Allah SWT adalah mereka yang tergolong dalam jenis ketiga dari golongan orang-orang yang dipandang oleh masyarakat iaitu tokoh agama. Perkara ini kerana, masyarakat memerlukan para ulama, ahli ibadah dan orang-orang kaya. Menurut beliau lagi, jika tiga kelompok manusia ini rosak maka rosaklah keadaan masyarakatnya. Oleh sebab itu, berdasarkan pengertian oleh Ibnu Katsir (2008b) tersebut menjurus kepada kepentingan pihak-pihak seperti ilmunan, golongan agama dan mereka yang mempunyai harta dalam mentadbir sesebuah negara. Sementara itu, perkataan emas diertikan sebagai sesuatu yang berharga kepada manusia. Namun, demikian Allah SWT memperingatkan bahawa seseorang tidak seharusnya menyimpan sebagai hak perseorangan tetapi Allah SWT menyeru supaya seseorang itu membelanjakan ke jalan Allah SWT. Bagi, perkataan “*membelanjakan*” boleh membawa erti bersedekah seperti berwakaf, amalan tersebut untuk mendapat keredaan Allah SWT. Allah SWT juga mengingatkan bahawa seksa yang pedih akan diterima kepada mereka yang tidak membelanjakan hartanya ke jalan Allah SWT.

Seterusnya berkenaan dalil keempat, berhubung dengan surah *Al-Kahf* 18:31, berdasarkan surah ini Allah SWT telah berfirman bahawasanya:

“Mereka itu, disediakan baginya syurga yang kekal, yang mengalir di bawahnya beberapa sungai; mereka dihiaskan di dalamnya dengan gelang-gelang tangan emas, dan memakai pakaian hijau daripada sutera yang nipis dan sutera tebal yang bersulam; mereka berehat di dalamnya dengan berbaring di atas pelamin-pelamin (yang berhias). Demikian itulah balasan yang sebaik-baiknya dan demikian itulah syurga tempat berehat yang semolek-moleknya

(al-Kahfi, 18:31).

Secara dasarnya, Ibnu Katsier (1994) menghuraikan ayat ini dengan menggambarkan keadaan orang-orang yang berbahagia iaitu orang-orang yang beriman kepada Allah SWT, beriman kepada rasul-rasul dan risalah yang dibawa serta melakukan amalan soleh yang diperintahkan oleh Allah SWT kepadanya. Selanjutnya, Ibnu Katsier (1994) menerangkan bagi mereka itu Allah SWT menyediakan sebagai pahala atas amal-amal baiknya yang di bawah mengalir sungai-sungai, sedang mereka sebagai penghuninya mengenakan gelang-gelang emas dan berpakaian hijau dari sutera halus dan sutera tebal serta mereka duduk bersandar di dalam syurga.

Justeru itu, surah *Al-Kahf* 18:31 ini menggambarkan tentang keindahan syurga. Perkataan emas digunakan sebagai menggambarkan peranannya sebagai barangan perhiasan seperti gelang-gelang emas yang cantik dan indah. Allah SWT juga menggambarkan bahawa nikmat di dalam syurga termasuklah gelas, pinggan yang diperbuat daripada emas dan perak. Begitu juga, gambaran tentang pakaian yang diperbuat daripada kain sutera hijau yang halus dan tebal serta bersulam. Sehubungan dengan itu, hakikat sebagai manusia khasnya umat Islam berhasrat

untuk dikurniakan nikmat syurga pada hari akhirat kelak dan menjadi kewajipan umat Islam melaksanakan perintah Allah SWT dan meninggalkan segala larangannya.

Secara umumnya, justifikasi pemilihan ayat-ayat berkenaan “gelang-gelang emas”, perhiasan emas seperti piala dan gelas emas mempamerkan kekuatan logam emas. Pertama, emas adalah logam yang berharga dan bernilai kepada manusia. Kedua, logam emas mempunyai nilai instrinsik tersendiri. Ketiga, logam emas sebagai perhiasan yang berguna kepada manusia dan dikaitkan tentang kecantikannya. Justeru terdapat perkaitan yang jelas bahawa logam emas memberi kelebihan tersendiri memandangkan dinar emas adalah mata wang yang dihasilkan daripada logam yang bermutu tinggi.

Selanjutnya, penggunaan perkataan emas dalam surah *Al-Kahf* 18:31 turut mempunyai persamaan dengan beberapa surah yang lain antaranya surah *al-Hajj* 22:23, surah *al-Fatir* 35:33, surah *al-Zukhruf* 43:53 dan surah *al-Zukhruf* 43:71 yang mewakili surah kelima, keenam, ketujuh dan kelapan dalam perbincangan ini. Bagi surah *al-Hajj* 22:23, Allah SWT telah berfirman yang bermaksud:

“Sesungguhnya Allah akan memasukkan orang-orang yang beriman dan beramal soleh ke dalam syurga yang mengalir padanya beberapa sungai; mereka dihiaskan di situ dengan gelang-gelang emas dan mutiara, dan pakaian mereka di situ dari sutera”
(*al-Hajj*, 22:23).

Berdasarkan Ibnu Katsier (1994), perkara yang dikemukakan dalam surah *al-Hajj* 22:23 ialah menceritakan keadaan ahli neraka dan derita yang menerima pelbagai siksaan dan azab, maka dalam ayat ini Allah SWT menceritakan keadaan ahli syurga dan apa yang tersedia bagi mereka berupa kesenangan, kebahagiaan dan kelazatan hidup. Kemudian, mengalir sungai-sungai di bawah syurga mereka. Begitu juga, pakaian-pakaian sutera dan perhiasan-perhiasan dari emas dan mutiara, serta pergaulan yang suci bersih di antara mereka. Sementara itu, dalam surah *al-Fatir* 35:33 Allah SWT telah berfirman bermaksud:

“(Balasan mereka ialah) Syurga-syurga “Adn”, yang mereka akan masukinya; mereka dihiaskan di dalamnya dengan gelang-gelang daripada emas dan mutiara; dan pakaian mereka di situ adalah daripada sutera”
(*al-Fatir*, 35:33).

Dalam pada itu, Ahmad Mustafa Al-Maraghiy (2001d), memberi penjelasan bahawa dalam surah ini, Allah SWT menggambarkan syurga yang penuh dengan kenikmatan yang akan dimasuki oleh orang yang menerima warisan daripada mereka berupa al-Qur’an. Di sana mereka akan berhias dengan gelang-gelang daripada emas dan mutiara manakala pakaian mereka pula daripada sutera. Sementara itu, dalam surah *al-Zukhruf* 45:53 yang bermaksud seperti berikut:

“(Kalau betul ia seorang Rasul) maka sepatutnya dia dipakaikan (oleh Tuhannya) gelang-gelang emas (yang menandakan ia seorang pemimpin), atau datang malaikat bersama-sama dengannya (sebagai saksi tentang kebenarannya)”
(*al-Zukhruf*, 43:53).

Seperti mana yang dinyatakan oleh Ahmad Mustafa Al-Maraghiy (2001e), beliau mentafsirkan dengan menimbulkan persoalan mengapakah Tuhan tidak memberikan gelang emas sebagai pengiktirafan-Nya untuk membuktikan kebenaran dakwaan seperti yang dilakukan oleh seorang raja tersebut. Kemudian, Firaun meneruskan dakwaannya dan menyatakan tidak ada pembantu dari kalangan para malaikat yang membantunya. Persoalan dinyatakan lagi, mengapakah Nabi Musa A.S tidak datang bersama para malaikat yang sentiasa mengiringnya, membantu setiap urusannya dan menyatakan kesaksiaan tentang kebenaran kenabiannya seperti yang biasa kami lakukan untuk setiap urusan penting, jika pengakuannya itu benar. Mengambil kira konteks pentafsiran yang dihuraikan bagi surah *al-Zukhruf* 43:53 berikut, pengertian yang dinyatakan adalah memfokuskan ayat ini kepada pendakwaan Firaun terhadap gelas emas dan penghuraian tentang para malaikat. Oleh yang demikian, ketiga-tiga surah yang dinyatakan dapat dirumuskan bahawa terdapat tiga kali diungkapkan tentang peranan emas sebagai perhiasan iaitu “gelang-gelang emas” yang menggambarkan kenikmatan dan keindahan syurga maka dalil kelima, keenam dan ketujuh turut sama mempamerkan emas yang disifatkan sebagai perhiasan.

Kemudian, bagi dalil kelapan dalam surah *al-Zukhruf* 43:71, ungkapannya disebut sebagai “piala-piala emas” turut sama menonjolkan sifatnya sebagai perhiasan. Perkara ini diungkapkan dalam firman Allah SWT yang bermaksud:

“Diedarkan kepada mereka pinggan-pinggan besar dan piala-piala daripada emas; dan di dalam syurga itu pula disediakan segala yang diinginkan oleh nafsu serta di pandang indah oleh mata; dan (dikatakan kepada mereka): “kamu adalah tetap kekal di dalamnya”

(al-Zukhruf, 43:71).

Bagi maksud ayat dalam surah ini, Sayyid Qutb (2000c), menerangkan tentang kegembiraan dan sukacita yang dinikmati di dalam syurga, dinyatakan lagi bahawa tanda-tanda dapat dilihat pada setiap bahagian anggota dan rupa paras setiap penghuninya. Kemudian, sekiranya digambarkan melalui imaginasi penglihatan bahawa terdapat pinggan-pinggan, makanan-makanan, minuman-minuman dan piala-piala dari emas diedarkan kepada ahli syurga. Begitulah keadaan ahli-ahli syurga apabila mereka sentiasa memperolehi segala yang diidamkan oleh hati mereka, maka di sana terdapat kelazatan dan kenikmatan, kesempurnaan dan keindahan mata memandang yang diberikan. Justeru, surah *al-Zukhruf* 43:71 tersebut menggambarkan bahawa logam emas adalah sesuatu yang berharga dan menjadi keindahan.

iii. Dalil-dalil Dalam al-Qur'an yang Menyentuh Tentang Dirham dan Wariq

Secara umumnya, perbincangan mengenai dirham dan *wariq* mencakupi dua ayat. Berdasarkan kepada al-Qur'an, terdapat sekurang-kurangnya satu perkataan dirham yang disebut di dalamnya. Begitu juga dengan perkataan *wariq* yang bermaksud perak turut disebut sebanyak satu kali. Perkara ini disebut dalam surah *Yusuf* 12:20 dan surah *Al-Kahf* 18:19. Melalui kedua-dua surah ini Allah SWT berfirman yang bermaksud:

“Dan (setelah berlaku perundingan) mereka menjualnya dengan harga yang murah, iaitu beberapa dirham sahaja bilangannya; dan mereka adalah orang-orang yang tidak menghargainya”

(Yusuf, 12:20).

Ahmad Mustafa Al-Maraghiy (2001c) menerangkan tentang nabi Yusuf a.s semasa di Mesir dalam situasi urusan jual beli sesuatu barangan, semasa urusan jual beli tersebut harga barangan yang ditetapkan adalah murah sekiranya dibandingkan dengan harga biasa. Dinyatakan bahawa urusan jual beli tersebut hanyalah memerlukan beberapa dirham sahaja dan tidak boleh ditimbang. Oleh yang demikian, mengambil kira pentafsiran dalam surah *Yusuf* 12:20 tersebut, pengertian lebih menjurus ke arah penggunaan dirham sebagai instrumen pertukaran jual beli. Berbalik kepada surah *Al-Kahf* 18:19 yang bermaksud sebagaimana berikut, Allah SWT telah berfirman bahawa:

“Dan demikianlah pula kami bangkitkan mereka, supaya mereka bertanya-tanya sesama sendiri. Salah seorang di antaranya bertanya: Berapa lama kamu tidur? Mereka menjawab: Kita telah tidur selama sehari atau sebahagian dari sehari. Mereka berkata: Tuhan kamu lebih mengetahui tentang lamanya kamu tidur; sekarang utuslah salah seorang daripadamu, membawa wang perak ini ke bandar; kemudian biarlah dia memilih jenis makanan yang baik; kemudian hendaklah ia membawa untuk kamu sedikit habuan daripadanya; dan hendaklah ia berlemah lembut; dan janganlah dia memberitahu akan hal kamu kepada sesiapa pun”
(al-Kahfi, 18:19).

Pengertian bagi maksud dalam surah *Al-Kahf* 18:19, telah dihuraikan oleh Ibnu Katsier (1994) berkenaan kisah pemuda-pemuda yang ditidurkan di dalam gua dan mereka dibangunkan oleh Allah SWT setelah 309 tahun berlalu. Perkara ini dinyatakan bahawa sebagaimana mereka ditidurkan, maka dibangunkan daripada tidurnya dalam keadaan sihat tanpa sebarang kekurangan walaupun tidak makan dan tidak minum. Dijelaskan bahawa, semasa pemuda-pemuda tersebut terjaga daripada tidur, salah seorang daripada pemuda tersebut telah pergi ke kota dengan membawa lebihan wang perak untuk membeli makanan sebagai keperluan. Secara jelasnya, pentafsiran ringkas tentang surah *Al-Kahf* 18:19 yang dikemukakan sebelum ini memperlihatkan bahawa fungsi dirham dan *wariq* adalah satu barangan yang digunakan dalam urusan jual beli.

iv. Perbincangan dalil-dalil al-Qur'an Mengenai Dinar Emas Sebagai Medium Berwakaf
Secara umumnya, dalil mengenai dinar emas menjurus kepada harta yang bernilai, manakala dalil-dalil al-Qur'an yang menyebut terus perkataan emas mempunyai lima perkara. Perkara pertama mencakupi perkara-perkara seperti perhiasan, kecantikan, pembalasan yang pedih kepada golongan kafir dan sikap kedekut untuk bersedekah. Perkara kedua pula, terdapat empat dalil yang secara khusus mengaitkan emas sebagai perhiasan iaitu gelang-gelang emas. Ketiga, terdapat beberapa dalil yang mempunyai perkataan emas yang memperlihatkan gambaran kenikmatan dan keindahan di syurga. Akhirnya, perkara kelima ialah terdapat dalil yang mengaitkan dengan perbuatan menyimpan emas iaitu tidak membelanjakan harta ke jalan Allah SWT.

Oleh yang demikian, secara asas penelitian mendapati terdapat gambaran jelas bahawa emas adalah satu barangan yang berharga dan dikaitkan dengan kekayaan, kemewahan atau sesuatu yang bernilai. Namun, mereka yang memiliki kekayaan hendaklah memberi sedekah dan membantu orang dalam kesulitan. Dirham dan *wariq* pula lebih menjurus kepada alat pertukaran jual beli. Berbalik kepada dalil-dalil mengenai wakaf, dalil-dalil yang dikemukakan mengenai wakaf lebih bersifat umum, maka penerangan tentang wakaf itu sendiri adalah terhad. Walau bagaimanapun, perkara ini sebenarnya sudah tersirat dalam nas-nas yang berkaitan dengan amalan bersedekah seperti melakukan kebajikan dan kebaikan. Berdasarkan kepada

keterbatasan tentang wakaf maka jumlah sesuatu atau kadar bilangan untuk bersedekah juga adalah terhad.

Namun, sudah dinyatakan melalui surah *al-Baqarat* 2:219 seperti mana yang telah dibincangkan sebelum ini. Maka, dengan ini berdasarkan perbincangan mengenai dalil-dalil tentang wakaf dan dalil-dalil tentang dinar emas didapati tidak terdapat sebarang nas yang menyebut tentang dinar emas sebagai barangan untuk berwakaf, tetapi sebagai instrumen pertukaran dan barangan bernilai ada dinyatakan. Walau bagaimanapun, dalam surah *al-tawbat* 9:34, ada mengungkapkan tentang "*orang-orang yang menyimpan emas dan perak*" dan ungkapan "*tidak membelanjakannya pada jalan Allah*". Berdasarkan kedua-dua ungkapan yang dinyatakan dapat difahami bahawa Allah SWT menyeru supaya jangan menyimpan harta kekayaan seperti barang yang diperbuat daripada logam emas atau perak semata-mata, tetapi apa yang lebih penting daripada menyimpan adalah membelanjakan iaitu bersedekah termasuk berwakaf. Oleh sebab itu, terdapat perkaitan tentang mekanisme yang digunakan dengan amalan baik yang hendak dilakukan dikaitkan dengan amalan bersedekah.

Penutup

Pada akhirnya, terdapat dua rumusan yang dapat dikenal pasti. Pertama, tidak ada dalil al-Qur'an yang menerangkan tentang wakaf menggunakan dinar emas. Kedua, perbincangan tentang wakaf dan dinar dalam al-Qur'an adalah lebih terhad dan terbatas. Sehubungan dengan itu, hasil perbincangan mendapati bahawa terdapat penggunaan dinar emas dalam konteks bersedekah sebagaimana amalan wakaf.

Rujukan

- Ahmad Mustafa Al-Maraghiy (2001a). *Tafsir al-Maraghiy Jilid 1, Juzuk 1 & 2*. Kuala Lumpur: Dewan Bahasa dan Pustaka.
- Ahmad Mustafa Al-Maraghiy (2001b). *Tafsir al-Maraghiy Jilid 2, Juzuk 2 & 3*. Kuala Lumpur: Dewan Bahasa dan Pustaka.
- Ahmad Mustafa Al-Maraghiy (2001c). *Tafsir al-Maraghiy Jilid 6, Juzuk 11 & 12*. Kuala Lumpur: Dewan Bahasa dan Pustaka.
- Ahmad Mustafa Al-Maraghiy (2001d). *Tafsir al-Maraghiy Jilid 11, Juzuk 21 & 22*. Kuala Lumpur: Dewan Bahasa dan Pustaka.
- Ahmad Mustafa Al-Maraghiy (2001e). *Tafsir al-Maraghiy Jilid 13, Juzuk 25 & 26*. Kuala Lumpur: Dewan Bahasa dan Pustaka.
- Ahmad Mustafa Al-Maraghiy (2001f). *Tafsir al-Maraghiy Jilid 13, Juzuk 21 & 22*. Kuala Lumpur: Dewan Bahasa dan Pustaka.
- HAMKA (1983). *Tafsir al-Azhar, Juzu''7*. Singapura: Pustaka Nasional Pte Ltd Singapura.
- Ibnu Katsier (1994). *Terjemahan Singkat Tafsir Ibnu Katsier: Jilid 5*. Kuala Lumpur: Victory Agencie.
- Ibnu Katsir (2008a). *Tafsir Ibnu Katsir Jilid 2*. Indonesia: Pustaka Iman asy-Syafi''i.
- Ibnu Katsir (2008b). *Tafsir Ibnu Katsir Jilid 4*. Indonesia: Pustaka Iman asy-Syafi''i.
- Razali Othman (2013). *Instrumen Wakaf Tunai: Analisis Falsafah Penciptaan Wang Fiat Daripada Perspektif Maqсад Wakaf Tunai*, Kertas Kerja dibentangkan di The 7th Isdev International Graduate Workshop (INGRAW 2013) anjuran Pusat Kajian PengurusanPembangunan Islam (ISDEV) di Dewan Persidangan Uni versiti (DPU) USM, Pulau Pinangpada 30-31 Oktober 2013.
- Salmy Edawati Yaacob, Sanep Ahmad & Wan Najihah Wan Mohd Zabaria (2009). *Kestabilan Mata Wang dalam Menangani Krisis Ekonomi: Ke Arah Penggunaan Dinar Emas*, Kertas

- kerja dibentangkan di Seminar Penjanaan Ekonomi Melalui Transaksi Wang Dinar 2009 di Institut Latihan Islam Malaysia (ILIM), Selangor pada 27 Ogos 2009
- Sayyid Qutb (2000a). *Tafsir Fi zilalil Quran, Di Bawah Bayangan al-Qur''an Jilid 2*. Kelantan: Pustaka Aman Press Sdn. Bhd.
- Sayyid Qutb (2000b). *Tafsir Fi zilalil Quran, Di Bawah Bayangan al-Qur''an Jilid 3*. Kelantan: Pustaka Aman Press Sdn. Bhd.
- Sayyid Qutb (2000c). *Tafsir Fi zilalil Quran, Di Bawah Bayangan al-Qur''an Jilid 14*. Kelantan: Pustaka Aman Press Sdn. Bhd.
- Zaharuddin Abd. Rahman (2010). *Keingkaran Menempah Ancaman Riba dan Kewangan Semasa*. Selangor: Tihani Cetak Sdn. Bhd.